



UKA 2018/19

8/10-2018

Justus Hansen

**Kalaallit Nunaanni pinerluttulerinermi inatsisip aamma Kalaallit Nunaanni
eqqartuussisarnermut inatsisip (Kinguaassiuutitigut pinerluuteqartarnerit il.il.)
allangortinnissaat pillugit inatsisissatut siunnersuummut missingiummut Namminersorlutik
Oqartussat isumaqataanissaat pillugu Inatsisartut aalajangiiffigisassaattut siunnersuut .**

(Isumaginninnermut Inatsisinillu Atuutsitsinermut Naalakkersuisoq)

(Siullermeerneqarnera)

Demokraatini manna siunnersuut iluarisimaarluinnarpaput. Kalaallit Nunaanni kinguaassiuutitigut pinerluuteqartarnerit, amerlavallaarujuussuaqaat aamma taamaassimavoq ukiorpassuanngortuni.

2016-mi inuit nunami maani tusintiungaangata pinngitsaaliinerit arfineq-marluk nalunaarutigineqartarput. Danmarkimi assersuutigalugu kisitsit 0,7 -iuvoq. Allatut oqaatigalugu nunatsinni nalunaarutigineqartartut quleriaammik amerlanerupput. Tamatuma uppernarsarpaat ajornartorsiuteqartugut imaannaanngitsumik.

2017-mi nalunaarutigineqarput pinngitsaaliinerit 132-t, 2016- mut naleqqiullugit ikinnerulaarlutik, piffissalli ukiut tallimanik sivisussuseqartup iluani kisitsisit qiviarutsigit ajoraluartumik ikileriarsimannngillat. Aamma taamaappoq inunnik 15-t inorlugit ukiulinnik atoqateqartarneq eqqarsaatigalugu. 2016-mut naleqqiullugu ikilialaarsimaput piffissalli ukiunik tallimanik sivisussuseqartup iluani pitsannguallattoqarsimannngivippoq.

Kinguaassiuutitigut pinerluffigineqarneq eqqortuneqartumut aseruilluinnartarpoq aamma inuunerup sinnerani kingunerlutsitsisoqartarpoq. Inuiaqatigiittut eqqorneqartut pillugit pinerluttartut pillartariaqarpagut, ajornanngippat misigitillugit kingorna taamaalioqqittussajunnaarlugit. Iluamik pillaasarnerup imaassinggaavoq allat kanngutsaattuliorlutik pinerlunnissaminnik eqqarsartut avaartissinnaassagai.

Annermik iluarisimaarparput siunissami meeqqamut aqqaneq-marluk ataallugit ukiulimmut



qanorluunniit kinguaassiutitigut atoqateqarneq pinngitsaaliinertut isigineqartalissammat. Tassa imaappoq meeqqamik kinguaassiutitigut arlaatigut atoqateqartut ullumimut naleqqiullugu sakkortunerujussuarmik pilarneqartalissapput, tamannalu pitsaalluinnarpoq.

Demokraatin kissaatigaarput suliniutit tamakku pissutaallutik siunissami kinguaassiutitigut pinerlunnerit ikinnerusut inuiaqatigiinni takusalerumaarigut.

Taamatut oqaaseqarluta siunnersuut ilalerparput innersuullugulu Inatsisinik atuutsitsinermut Ataatsimiitaliamut.